

AUGLÝSING

um laun stundakennara.

1. gr.

Laun stundakennara miðast við þá launaflokka, sem kennararnir myndu taka laun samkvæmt, ef þeir væru fastir kennarar, og skulu vera 83% af launum þeirra miðað við fullan kennslustundafjölda og 5 ára starfstíma.

2. gr.

Grunntala hjá kennurum gagnfræðaskóla, húsmæðraskóla og iðnskóla skal vera 83% af ellefuföldum mánaðarlaunum viðeigandi launaflokka, en hjá öðrum kennurum skal grunntalan vera 83% af tólföldum mánaðarlaunum viðeigandi launaflokka. Mánaðarlaun samkvæmt launaflokkum skulu vera þau, sem við eiga eftir 5 ára starfstíma.

3. gr.

Deilitala er árlegur kennslustundafjöldi fastra kennara í hlutaðeigandi skóla við samskonar kennslu.

Vikulegan kennslustundafjölda skal telja:

36 í barnaskólum og Heyrnleysingjaskóla.

30 í gagnfræðaskólum, húsmæðraskólum og iðnskólum.

27 í Hjúkrunarskóla, Myndlista- og handiðaskóla, Kennaraskóla, menntaskólum, sérgreinaskólum fyrir kennaraefni, tækniskóla, Stýrimannaskóla, Vélskóla, Mat-sveina- og veitingaþjónaskóla, búnaðarskólum og Garðyrkjuskóla.

Í hverjum mánuði skal telja 4 kennsluvikur.

Í árinu skal telja 8 kennslumánuði hjá kennurum gagnfræðaskóla, húsmæðraskóla og iðnskóla, en 9 mánuði hjá öðrum.

Kennslustundafjöldi söngkennara og tónlistarkennara, kennara við vanvitaskóla, heyrnleysingjaskóla og aðra skóla afbrigðilegra og vangefinna barna, skal vera $\frac{4}{5}$ af kennslustundafjölda almennra kennara.

4. gr.

Tímakaup stundakennara er grunntalan samkvæmt 2. grein, deilt með deililögunni samkvæmt 3. grein. Tímakaupið skal reikna í heilum krónum.

5. gr.

Eigi skal greiða fyrir eyður, sem verða kunna í starfstíma stundakennara.

6. gr.

Stjórnskipaðir prófdómendur skulu hafa sama tímakaup og stundakennarar skólanna, er þeir starfa við. Greiða skal fyrir hverja klukkustund prófdómara-starfs eins og fyrir eina kennslustund.

7. gr.

Orlofsfé er innifalið í tímakaupinu.

8. gr.

Laun stundakennara barnaskóla skal miða við 40 mínútna kennslustund, en í öllum framhaldsskólum við 45 mínútna kennslustund. En sé hver kennslustund lengri eða skemmri, breytast launin í hlutfalli við það.

9. gr.

Stundakennarakaup skal greiða fyrir kennslu, sem fram fer á tímanum frá kl. 8 til kl. 17, þar með talinn matartími.

Fyrir kennslu eftir kl. 17, svo og fyrir kennslu eftir kl. 12 á laugardögum, skal kaup stundakennara vera jafnhátt og eftirvinnukaup fastra kennara í viðkomandi launaflokkum án tillits til lengdar kennslustundar. Þó skal greiða stundakennarakaup eftir áðurnefnd tímamörk, sé það hærra en eftirvinnukaup.

10. gr.

Auglýsing þessi er gefin út í samráði við önnur ráðuneyti, sem með skólumál fara, svo og fjármálaráðuneytið, og gilda ákvæði hennar frá 1. september 1968 og þar til öðruvísi kann að verða ákveðið.

Í menntamálaráðuneytinu, 25. september 1968.

F. h. r.

Birgir Thorlacius.

Runólfur Þórarinsson.

REGLUGERÐ

fyrir Snæfellsness- og Hnappadalssýslu, um fjallskil o. fl.

I. KAFLI

Um fjárrekstra á afréttir og notkun fjalilanda.

1. gr.

Hreppsþúar í þeim sveitum, þar sem nægileg afréttarlönd eru, skulu, ef þeir að álitum hreppsnefndar ekki eiga nægilegt fjallland fyrir sjálfa sig, skyldir að reka í miðja afrétt að vorinu allt sauðfé sitt. Nú eru engin slík afréttarlönd til, heldur aðeins heimalönd og búfjárhagar. Getur þá hreppsnefnd annast um, ef ekki fást upprekstrarlönd í öðrum hreppum, og fénu jafnað niður á þær jarðir, sem að dómi ítölunefndar eða hreppsnefndar eru ekki fullsetnar og með samkomulagi við umráðamenn viðkomandi jarða. Skulu sveitarmenn skyldir að nota slíkan upprekstur eftir tilvísan hreppsnefndar eða ítölunefndar, svo framarlega sem upprekstrartollurinn fer ekki fram úr því, sem ákveðið er hér á eftir. Þar sem fjáreigendur Stykkishólms eru í fjallskila- og réttarfélagi við Helgafellssveit, ber fjáreigendum Stykkishólms upprekstur í Helgafellssveit fyrir það upprekstrargjald, sem fjallskilareglugerðin ákveður eftir samkomulagi hreppsnefndar eða ákvörðun ítölunefndar.

2. gr.

Nú þykir einhverjum búendum eða jarðeigendum nauðsyn til bera, að ákveðið sé með ítölu, hve margt fé megi vera í heimalöndum eða fjalllöndum, og er þeim þá heimilt að krefjast ítölumats samkvæmt gildandi lögum um ítölu.

3. gr.

Í upprekstrartoll greiðast kr. 15.00 fyrir hverja roskna kind og skal tollur þessi vera greiddur innan októbermánaðarloka ár hvert, ef ekki er öðruvísi um samið. Sé ekki greitt á gjalddaga, ber hreppsnefnd að sjá um innheimtu gjaldsins og hvílir lögtaksréttur á upprekstrargjaldinu.